

YU SAVE KAREM BITEL NAT I KAM LONG OSTRELIA?

Wan gaed blong ol PALM skim woka

Yu save karem bitel nat i kam long Ostrelia blong yu yusum sapos i no bitim 10kg. Sapos yu stap long Ostrelia blong longtaem yu save askem famle blong yu blong sendem i kam long yu bitel nat we i no bitim 10kg. Be hemi agensem loa blong salem bitel nat.



Man i brekem loa taem i salem bitel nat long Ostrelia mo i save faen o go long prisem.

Yus blong bitel nat long Ostrelia

Ol woka anda long PALM skim oli save yusum, serem mo kakae bitel nat long Ostrelia be i no save salem.

Emploia blong yu bae i save blokem yu blong kakae bitel nat taem yu stap long wok. Hemi from se maet bitel nat i save mekem i had blong yu wok wetem sefti. Yu save kakae taem yu no stap wok.

Sapos yu spet taem yu kakae bitel nat bae i save damejem ples blo wok o long haos. I gud blong yu yusum wan plastik kontena blong spet long hem blong no mekem damej. Taem yu yusum wan kontena i gud blong sakem long pubel taem yu yusum finis, o wasem gud bifo yu yusum bakegen.

Ol fren mo famle i save sendem bitel nat i kam long yu tru long post taem yu stap long Ostrelia sapos hemi andanit long 10kg, mo bae i sud stap long wan klia plastik wetem setifiket blong phytosanitary (kwarantın). Bae yu save faenem moa diteil long saed blong ol rul long nekis pej.

Ol tabu long Pasifik

Samfala gavman blong ol Pasifik aelan mo ol plen kampani, inkludum Solomon Aelen mo Papua Niugini, oli gat ol rul long saed blong bitel nat olsem blong kakae mo karem i go ovasis.

Jekem Leba Sending Yunit blong yu blong faenemaot ol rul long kantri blong yu.

Ifek blong bitel nat long helt blong yu

Hemi impoten blong save ol ifek blong bitel nat long helt blong yu. Ol sot mo longtaem helt isu we bitel nat i save kosem i save inkludum:

- hatbit i spid, hae blad presa, swet mo hae bodi tempreja
- tut mo gam long maot i jenisim kala
- soa long maot mo gam disis
- kansa long maot (plante taem long lip, maot mo tang).

Sapos yu karem bitel nat i kam wetem yu long Ostrelia, yu mas mekem ol samting ia:



1. Karem wan setifiket blong phytosanitary (kwarantint) long gavman blong yu bifo yu travel

- Setifiket ia i mas inkludum eni infomesen mo stret tok we oli rikwaerem anda long ol kondisen blong biosikiuriti impot. Bae yu save ridim ol kondisen ia tru long ol instraksen long seksen daon 'Moa infomesen'.



2. Bae yu no save karem bitim 10kg i kam (hemia rul blong wanwan man)

- Mekem sua se yu putum long wan klia plastik.
- Sapos yu karem i kam bitel nat we i bitim 10kg, bae oli karem i go aotsaed long eapot blong inspektem. Bae oli jajem yu blong mekem hemia mo i save tekem fulap dei o wik blong oli givimbak long yu.



3. Fulumap stret incoming passenger card we oli givim long plen mo inkludum ol infomesen ia:

- Talemoot se yu karem bitel nat i kam mo talem stret se i stap wea, long hanbag o long jekin bag.
- Eni narafala pat blong plant we yu karem i kam (olsem laem mo korokua).
- Yu mas ansarem tru ol kwestin we olgeta ofisa long customs mo biosikiuriti i askem long yu.



4. Taem yu araev long Ostrelia

- Yu mas soem bitel nat blong yu wetem setifiket blong hem mo incoming passenger card long ol ofisa blong biosikiuriti.
- Maet wan biosikiuriti ofisa i jekem bitel nat blong yu.
- Sapos bitel nat blong yu hemi andanit long limit, mo yu karem ol stret pepa blong hem, mo i nogat bebet long hem bae oli givimbak long yu.

Moa infomesen

Sapos yu gat eni kwestin long saed blong karem o yusum bitel nat long Ostrelia, yu save faenem moa infomesen long ol ples ia:

- Australian Government Biosecurity Betel Nut Conditions, BICON: www.bit.ly/import-conditions-betelnut
- Leba Sending Yunit long sending kantri: www.palmscheme.gov.au/countries
- Ol kantri lieson ofisa o leba atase long Ostrelia: www.palmscheme.gov.au/contact

BICON

